

10. okt. 2016

Naalagaaffiit Peqatigiit Innarluutilinnut isumaqatigiissutaata atortuulersinneqarneranut aatillugu ussersormik atuisut, innuttaasullu allat attaveqarniarnermi ajornartorsiutillit isumaqatigiissummut ilaatinneqartut, nakorsiarnernanni malitseqartitsinermut kiisalu nangittumik katsorsarneqarnerannut atatillugu allakkatigut nassuiaammik tigusisalernissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Agathe Fontain, Inuit Ataqtigiit)

Inatsisartunut ilaasortap Agathe Fontain, Inuit Ataqtigiit aalajangiiffigisassatut siunnersuutaanut qujavugut, Siumumiillu oqaaseqatissarput imaappoq.

Saqqummiussaq soqutiginartorujussuuvoq. Ilisarnarlunilu takornartaanngilaq tamanna pillugu politikikkut iluarsisariaqartoq pillugu Siumumiit suleqataajumavugut.

Siumut innarluutillit atugaannut pitsanngorsaanissaq ineriartortuaannarnissaanik pingaartitsisuvoq. Innarluutillit tarnimikkullu nappaatillit isumagineqarnerat pitsaanerpaq angujumallugu sullissinissamik ilinniagallit amerlineqarnissaat Siumut kissaatigalugulu angujumasaraa, ullumikkullu sulisorineqartut pikkorissartuarnissaminnut periarfissaqartinneqartuarnissaat pingaartillugu.

Nunatsinni innarluutillit ikiorserneqartarfii isumagineqartarfiilu pitsanngorsarneqassapput atukkanut naleqqussarlugit, taamatullu nunatsinni innarluutilinnut najugaqarfii pisariaqartitsinermut naapertuuttut sulisoqarnikkullu naleqqussaaffiusut sapinngisamik pitsaanerpaamik ingerlanneqassapput. Tamatumani aamma ilaapput peqqinnissaqarfiup iluani sullinneqarnikkut atugassarititaasut pitsanngorsarneqarnissaat.

IPIS tassaavoq innarluutillit pillugit siunnersuisinnaasoq, aqutissiuinnaasoq, pisariaqartitsinikkullu tapertaasumik ikorfartueqataasinnaasoq. Pigeriikkavut atorluartariaqarpagut. Tusilartut pillugit pikkorissartitsinerit ingerlanneqarsinnaappata, piumasaqaatigisinnaavarput suleqatigiinneq akimorlugu ineriartortitsineq ilinniartitaanerup iluani aamma ilanngunneqartariaqartoq. Ilisimavarput sunaluunniit naggueqartuaannartariaqarpoq aallartinniagaq piviusunnussappat. Ilinniartinnut nutserisunnorniatut ittuni ussersorsinnaanermik ilaqartumik ilinniagaqarnissaat piumasaqaataasariaqarpoq. Innarluutillit atugaannut oqilisaassiniarutta pingaartittariaqarpavut atugassarititat pitsanngorsartuarnissaannut.

Peqqinnissaqarfik inuiaqtigiit pitsaasumik sullinnissaannut pisussaaffeqarput. Nakorsiartoq kinaluunniit naapertuuttumik sullinneqartariaqarpoq, aamma taamaappoq tusilartut

nakorsiarnermi pisariaqartitsinerat naapertorlugu sullinneqarnissaat. Ussersornermik ilinniagalimmik peqqinnissaqarfiup iluani peqarnissaq inissaminiittariaqaraluartoq Siumut isumaqarpoq. Taamatullu ilanngutinngitsoorumanngilarput ilaatigut tusilartut nakorsiarnissamik kissaateqartarmarta ilaqtaminnut imaluunniit qanigisaminnut tusartikkumangisaminnik. Tamanna ataqqinninnermik pisinnaatitaaffittullu isigineqarnissaa pingaartipparput.

Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat naapertorlugu illersorneqarnissaq avaquneqarsinnaanngilaq.

l) akuerinnittut inuit innarluutillit nunani tamaniittut inuunermi atugaasa pitsanngorsarneqarnissaat anguniarlugu nunarsuarmit akornanni suleqatigiinnikkut pitsanngorsaanissap pisariaqassusianik, pingaartumik nunani ineriartortitani.

f) akuerinnittut, inuit innarluutillit pillugit nunarsuarmioqatigiit iliuusissatut pilersaarutaat aammalu malittarisassaata tamanut atuuttut tunngavigalugit politikkinik, pilersaarutinik, aaqqissuussinernik aammalu suliniutinik siuarsaanermi, aammalu nunarsuarmit tamarmi, nunani ataasiakkaani, nunarsuarmit suliniutit inissisimanermikkut qaffasissusiannik, ilusiliinernik naliliisarnernilu periutsinik ilitsersuutinillu pingaartitsisut, inuit innarluutillit assigiimmik periarfissaqartinneqarnissaata suli annertusaqqinneqarnissaa siunertaralugu.

Taakkuinnaalluunniit naqissuserlugu uppersarparaat uagut nunatut siuariartortutut pisussaaffitta pitsanngorsarnissaa innarluuteqartut pillugit siuarsartariaqaripput. Taamaattumik aalajangiiffigisassatut siunnersuut taperserlugu Siumumiit suleqataajumavugut. Ataatsimiittaliamullu susassaqtumut suliarineqarnissaa innersuupparput.

Laura Táunâjik

Siumut